

**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՊԵՏԱԿԱՆ ԵԿԱՄՈՒՏՆԵՐԻ ԿՈՄԻՏԵ
ՀԱՐԿԱՅԻՆ ԵՎ ՄԱՔՍԱՅԻՆ ՄԱՐՄԻՆՆԵՐԻ ԲՈՂՈՔԱՐԿՄԱՆ
ՀԱՆՁՆԱԺՈՂՈՎ**

ՈՐՈՇՈՒՄ N 36/26

ք.Երևան

23 օգոստոսի 2022թ.

Հայաստանի Հանրապետության պետական եկամուտների կոմիտեի հարկային և մաքսային մարմինների բողոքարկման հանձնաժողովը (այսուհետ նաև՝ Հանձնաժողով), քննության առնելով վճարված գումարի և առկա պետական տուրքի գծով պարտավորության փոխմարում կատարելու վերաբերյալ «ՄԵՏԷՔՍԻՄ ՏԵՐՄԻՆԱԼ» ՍՊ ընկերության (ՀՎՀՀ՝ 02249459) դիմում-բողոքը՝

ՊԱՐԶԵՑ

«ՄԵՏԷՔՍԻՄ ՏԵՐՄԻՆԱԼ» ՍՊ ընկերությունը (այսուհետ նաև՝ բողոքաբեր) հայտնում է, որ Արտաշատի խճ. 13 հասցեում գործող ընկերությունը զբաղվում է մաքսային հսկողության տարածքում ձեռնարկատիրական գործունեությամբ: 2022թ.-ի մարտ ամսին պարզել է, որ ընկերության հարկային պարտավորությունների անձնական քարտին առկա է 1998489 ՀՀ դրամ գերավճար պետական տուրքի մասով: Հաշվի առնելով վերոգրյալը 29.03.2022թ-ին ՀՀ ՊԵԿ նախագահին ուղղված դիմումով խնդրել է նշված գումարը վերադարձնել կազմակերպությանը՝ փոխանցելով կազմակերպության բանկային հաշվեհամարին:

Ի պատասխան դիմումին, 19.04.2022թ-ին կազմակերպությանը ուղարկված թիվ 70-6/26755-2022 գրությունից պարզվել է, որ անձնական քարտում պետական տուրքի մասով պարտավորությունները ամբողջությամբ հաշվառված չեն եղել: Ճշտումներ կատարելու արդյունքում առաջացել է պետական տուրքի գծով պարտավորություն և 18.04.2022թ-ի դրությամբ պարտքի մնացորդը կազմել է 1695784 դրամի չափով պետական տուրքի գծով պարտավորություն, որից տույժ՝ 694284 ՀՀ դրամ:

Քանի որ 25.11.2017թ.-ի Պետական տուրքի մասին ՀՀ օրենքի փոփոխություններով (ՀՕ 171-Ն) նշված օրենքի 19-րդ հոդվածի 10-րդ «Մաքսային բնագավառ», բաժինը ուժը կորցրած է ճանաչվել, նշված բաժինն կցված գանձապետական հաշվեհամարները փակվել են (900005016887 և 900005166229): Պարտքի մնացորդը մարելու նպատակով հարկային մարմնին ուղղված բանավոր հարցմանը ի պատասխան տրամադրել են 900005001699 հաշվեհամարը, որին և կատարվել է փոխանցումը: Որոշ ժամանակ անց պարզվել են, որ վճարված գումարը մուտք չի եղել կազմակերպության անձնական քարտին և առկա պարտավորությունը չի մարվել:

Հաշվի առնելով վերոգրյալը, խնդրում է, իրականացնել վճարված գումարի և առկա պետական տուրքի գծով պարտավորության փոխմարում:

Դրա անհնարինության դեպքում խնդրում է 900005001699 հաշվեհամարին վճարված գումարը վերադարձնել կազմակերպության «Հայրիզնեսբանկ» ՓԲԸ-ի 1150009970110100 հաշվեհամարին, և տրամադրել Պետական տուրքի մասին ՀՀ օրենքի 19-րդ հոդվածի ուժը կորցրած 10-րդ բաժինն վերաբերող իրական, ճիշտ հաշվեհամար, որին վճարում կատարելով

կմարվի կազմակերպության հարկային պարտավորությունների անձնական քարտում պետական տուրքի գծով առկա պարտավորությունը:

Տվյալ դեպքում Հանձնաժողովը հարկ է համարում նշել, որ ՀՀ հարկային օրենսգրքի 442-րդ հոդվածի 2-րդ մասի 7-րդ կետի համաձայն՝ հարկային մարմնի բողոքարկման հանձնաժողովն ընդունում է հարկ վճարողի դիմում-բողոքի քննարկման վարույթը կարճելու մասին համապատասխան գրավոր որոշում, եթե դիմում-բողոքում նշված պահանջը դուրս է հարկային մարմնի բողոքարկման հանձնաժողովի իրավասություններից:

ՀՀ հարկային օրենսգրքի 442-րդ հոդվածի 2-րդ մասի 8-րդ կետի համաձայն՝ հարկային մարմնի բողոքարկման հանձնաժողովն ընդունում է հարկ վճարողի դիմում-բողոքի քննարկման վարույթը կարճելու մասին համապատասխան գրավոր որոշում, եթե բացակայում է հարկային մարմնի կողմից բողոքարկվող անհատական իրավական ակտի, գործողության կամ անգործության դեպքը:

Ելնելով վերոգրյալից և ղեկավարվելով ՀՀ հարկային օրենսգրքի 442-րդ հոդվածի 2-րդ մասի 7-րդ և 8-րդ կետի դրույթներով ՀՀ ՊԵԿ հարկային և մաքսային մարմինների բողոքարկման հանձնաժողովը գտնում է, որ «ՄԵՏԷՔՍԻՄ ՏԵՐՄԻՆԱԼ» ՍՊԸ-ի դիմում-բողոքի քննարկման վարույթը ենթակա է կարճման:

Միևնույն ժամանակ «ՄԵՏԷՔՍԻՄ ՏԵՐՄԻՆԱԼ» ՍՊ ընկերությանը առաջարկվում է տվյալ հարցի լուծման նպատակով դիմել ՀՀ Ֆինանսների նախարարության Կենտրոնական գանձապետարան:

Ելնելով քննության արդյունքներից և ղեկավարվելով Հայաստանի Հանրապետության հարկային օրենսգրքի 20-րդ բաժնով, «Մաքսային ծառայության մասին» Հայաստանի Հանրապետության օրենքի 37-րդ հոդվածով, Հայաստանի Հանրապետության պետական եկամուտների կոմիտեի հարկային և մաքսային մարմինների բողոքարկման հանձնաժողովը


ՈՐՈՇՈՒՄ Է՝

Վճարված գումարի և առկա պետական տուրքի գծով պարտավորության փոխմարում կատարելու վերաբերյալ «ՄԵՏԷՔՍԻՄ ՏԵՐՄԻՆԱԼ» ՍՊԸ-ի դիմում-բողոքի քննարկման վարույթը կարճել:

Սույն որոշումն ուժի մեջ է մտնում իրազեկելուն հաջորդող օրվանից:

Սույն որոշմանը չհամաձայնվելու դեպքում այն ուժի մեջ մտնելու օրվանից երկու ամսվա ընթացքում կարող է բողոքարկվել դատարան:

8/25/2022



ԱՐՏՅՈՒ ՍՄԲԱՏՅԱՆ

ՀԱՆՁՆԱԺՈՂՈՎԻ ՆԱԽԱԳԱՀ՝ Signed by: SMBATYAN ARTYOM 3210860416

ԱՐՏՅՈՒ ՍՄԲԱՏՅԱՆ